

Kennt ihr emol unsern Hund nemme?

Wenn merr so schee gefroocht werdd, was macht merr doo? Ich habb mett de Achsele gezuckt unn habb die Fraa oogeguckt, weil die hott joo die gonz Arweit mett so emm Dier, unn wie die gesacht hott: No ja, ess iss joo enn liewe Kerl, eiern Pudel, doo hadde merrn.

Doo hadde merrn unn mussde sehe, wie merr mettem zurecht-kumme. De erst warer joo e bisje fremd unn hott alls on de Hausdier gesotze, als ob soi Fraasche, die vor zwaa Daach dort enaus gonge iss, grad widder eroikumme det. Wie awwer nochemol zwaa Daach erumm warn, hotter uns aach schunn emol oogeguckt, wanner nit fresse wollt.

Unn die ersde Daache konnsde so enn Hund nit alloo losse. Weil er wollt unnerhalte werrn, wollt ze futtern hawwe, wollt enaus, weil er gemusst hott, wollt monchmol mettem Ball spille unn oft soi Ruh hawwe.

Unn weiler joo onnernleits Pudel iss, hawwe merr gemacht was-ser wollt unn dess war monchmol schunn e bisje lüssdisch, weil der wollt grad dann was, wenn merr selbst was onnerst wollt. Doo war merr grad debei sich uff die Kautsch ze setze unn Noochrichte ze gucke, doo wollt de Hund enaus, also hott merr die Schuh widder oogezooche, iss mettem hinner die Heiser unn hott sich denewer gestellt, wanner on jedem Busch soi Boosche gehowwe hott.

Unn wenn merr unnerweechs ooner getroffe hott, der wusst dass mir koon Hund hawwe, dann konnt merr druff wette, dass der gesacht hott: Seider uff de Hund kumme?

Wenn ich den, der gefroocht hott, gut leide konnt, dann habb ich zur Antwort gewwe: Der iss nit uns, denn hawwe merr nor emol ferr ferrzeh Daach.

Awwer wenn dess ooner gefroocht hott, den ich nit leide konn - unn von dene gibts e paar -, dann habb ich zur Antwort gewwe: Mir uff de Hund kumme? – woher wolle Sie dess wisse? Unn habb debei gegrinst, weil der nit wusst, was ich gemoont habb: Im Mittelalter nemlich hott merr soi Grosche in e Truh geleecht, uff dere ihm Boddem enn Hund gemolt war. Unn wenss Geld all war unn merr konnt de Boddem seh, war merr ewe uff de Hund kumme.

Oofongs habb ich e paar Mol zu de Fraa gesacht: So verrzeh Daach sinn doch e long Zeit, merr konn sich joo nix vornemme, iss alls oogebugne on den Hund, ich wollt kooner hawwe.

Awwer dann, nooch zeh Daach, wars bassiert: Mir warn emol korz fort unn sinn hoomkumme, doo hott der Kerl vor Freud gegauzt, iss on uns hoch gehippt als wollter sich grad verroppe unn alser dann beim Fernseh uff unserne Fieß geleeche hott, dann isses uns nit nor on de Fieß warm worn. Unn als es dann soweit war, dass er abgeholt werrn sollt, doo hawwe merr uns oogeguckt unn gesacht: Jetz,

wo merr uns grad so schee on enn gewöhnt hawwe sollar schunn
widder fort? Mir deten gern noch e bisje behalte!

Dess Gonze habb ich dann dem Kättche erzählt, uffem Markt,
doo sacht se: Ei ich habb schunn emol droo gedenkt, wenn dem
Schorsch was bassiert, schaff ich merr so enn Hund oo.

Ich sach: Awwer denk droo, soon Hund hott de gonze Daach
Hunger, unn wanner älder werdd, schläft er vill, unn wenn de mettem
spaziern gehst, musser dauernd pinkele.

No ja unn? moonts Kättche, was iss debei? Doo deter mich näm-
lich immer on moin Schorsch erinnern.

Eiern Honnes